

Izjava OHR-a na konferenciji za medije međunarodnih organizacija

Zakoni o stečaju

OHR se slaže sa premijerom Hadžipašićem da entitetski zakoni o stečaju sadrže najbolja sredstva za zaštitu poslova u BiH kao i za otvaranje novih radnih mjesta. OHR poziva sve sindikate da zajedno sa entitetskim vladama rade na tome da se zakoni o stečaju koriste kao djelotvoran način za zaštitu postojećih i otvaranje novih radnih mjesta, ohrabrvanjem restrukturiranja i investicija.

Ovim zakonima se preduzećima omogućava da izvrše restrukturiranje i nastave sa radom umjesto da budu likvidirana. Prije donošenja ovih zakona, preduzeća su imala samo dvije mogućnosti – da budu likvidirana, što podrazumijeva otpuštanje svih radnika, ili da nastave raditi “na papiru” proizvodeći vrlo malo ili ništa, sa samo osnovnim osobljem i sa stotinama radnika na čekanju, bez plate i bilo kakvih drugih primanja.

Zakonima o stečaju preduzećima se omogućava da nastave raditi, da putem investicija osiguraju injekciju kapitala, izvrše restrukturiranje i prošire kapacitete. Restrukturiranje može podrazumijavati smanjivanje broja radnih mjesta, ali dugoročno gledano, stvara bolje izglede za otvaranje novih radnih mjesta.

Neke sindikalne organizacije su izrazile podršku ovom pristupu, shvativši da će biti koristan za radnike. Neke druge zagovaraju da sistem socijalne sigurnosti nije adekvatan za rješavanje problema izazvanih smanjenjem zaposlenosti. Prošle sedmice su entitetski zvaničnici i stručnjaci iz Svjetske banke završili pripreme za projekat u okviru kojeg će 12

miliona US\$ sredstava Svjetske banke biti stavljeno na raspolaganje za službe za pomoć u zapošljavanju. U toku naredne četiri godine, projektom će se pružiti pomoć radnicima u oba entiteta koji budu proglašeni tehnološkim viškom.

Donio sam dva dokumenta sa podacima koje je izradio USAID, a u kojima je izložen način na koji će funkcionirati zakoni o stečaju i koji će pomoći da se razjasne neki ozbiljni nesporazumi o ovim zakonima koji su odnedavno predmet rasprava.

HDZ Srednjebosanskog kantona nije ispunio standarde u oblasti obrazovanje

HDZ srednjebosanskog kantona ponovo je propustio ozbiljno pristupiti zadatku donošenja upravne odluke o ujedinjavanju "dvije škole pod jednim krovom" u kantonu. Umjesto toga, HDZ je u Kantonu 6 jučer predložio da Kantonalna skupština pokrene postupak za administrativno ujedinjavanje "dvije škole pod jednim krovom". Prijedlogom HDZ-a se ne ujedinjuju dvije škole pod jednim krovom, nego se sugerira odlaganje bilo kakve stvarne mjere, a ne navodi se ni kako bi ove škole bile ujedinjene.

Siguran sam da ćete se prisjetiti da je visoki predstavnik zatražio da se doneše jednostavna i jasna odluka o administrativnom i pravnom ujedinjavanju "dvije škole pod jednim krovom" u Kantonu 6. To znači da bi postojeće "dvije škole pod jednim krovom" bile uknjižene kao jedno pravno lice sa jednim direktorom škole i jednim školskim odborom.

Riječ je o Odluci koju su svi kantoni u Federaciji Bosne i Hercegovine već donijeli i koja neće uticati na jezik i nastavu kao ni na program prema kojem učenici rade. Njome se samo uklanja duplicitiranje troškova tako da bi to značilo da bi se umjesto na administraciju ionako ograničena sredstva više trošila na rad sa djecom.

HDZ u Kantonu 6 još uvijek ima vremena da do sutra ponovo

razmotri svoj stav i preduzme odgovarajuće korake, nešto što je još moguće, pod uslovom da postoji volja kako bi se osiguralo da se javna sredstva izdvojena za obrazovanje zaista troše na nastavu umjesto na ogromnu administraciju.

Ukoliko HDZ ne preduzme ove korake, visoki predstavnik će biti prisiljen da primijeni svoju Odluku od 27. aprila kojom su sredstva namijenjena za finansiranje HDZ-a u Kantonu 6 umanjena za pet posto. Sredstva za finansiranje HDZ-a u Kantonu 6 biće umanjena za dodatnih pet posto svake sedmice sve dok se ne preduzmu neophodni administrativni koraci. Visoki predstavnik je već nudio da će ova sredstva biti preusmjereni školama u ovom kantonu.